


Okutoburukalo san 2014

San 42nan - Bo 513nan

Songo = dorome 35



Mali musomanninw
ye basiketi
kupudafiriki ta siye 5

Ne 8

Kunnafonisében bota kalo o kalo - BP : 24 - Téléphone : 20.21.21.04 Kibaru bugufiye Bosola Bamako

Mali ni Efemni fila bee sago ye netaa sabatili ye



Nafoloko ministri Madamu Buware Fili Sisoko ni Efemni ka cidenw

Dijé wariko mabenni cakeda n'o ye Efemni ye, o ka ciden d'ow tun nana Mali ka wariko taabolo ségesége san 2014 setanburukalo tile 10 ka se a tile 25 ma. O taama in kunceto, ciden ninnu y'a jira k'u ye kunnafoni minnu soro Mali ka nafoloko cogoya kan, olu be se ka di Efemni nemogojekulu ma sisan a k'a fela fu kan. Sigi kelen tun be ka ciden ninnu makono, wa lahidu talen caman dafara. A kolosira ko yelema numan donna Mali ka nafoloko cogoya la. Cidenwy'a kolosi, ko kemesarada la, 5,8 farala Mali ka jamanakonosoro labugunda (PIB) hakekan san 2014 in na. Ocayara ka

teme hake min farala a kan san 2012 kono. Sabula fangadafiri ye jamana ka soro segin ko kosebe. A cayara ni san 2013 ta hake fana ye. Hake min farala jamanakonosoro hake kan o la, o ma teme 1,7 kan, k'a sababu ke samiyé goyaliye. Sanji ma foori, sene soro dögoyara. Geleya danteme ma ke san 2014 kono folo, sabula hake min farala fenw songo kan o ma teme kelen kan kemesarada la; hali n'i y'a soro san 2013, hake min farala fenw songo kan o ma 0,6 bo kemesarada la. A kolosira jatemine na, ko hake min bena fara jamanakonosoro hake kan san 2015 kono na, o tenu jigin

5,5 jukoro kemesarada la. Wa ko hake min bena fara fenw songo kan, o fana tenu 3 bo kemesarada la. O dun te geleyaba ye Afiriki tilebinyanfan waribonba (BCEAO) bolo.

Efemni ka cidenw ka nefoliw la, u y'a jira ko jaabi minnu soro Mali ni Efemni ka sigikafo folo ni filanan senfe, olu ye wasa ke. K'u fila bee bena don Efemni nemogojekulu bolo san 2014 in desanburukalo kono na, a k'u fesefese k'a hakilila di u kan. U ko fana, geleya minnu tun dennen bejamana ka baarakenafolo la, n'o ye wariba min donna jamanakuntigi ka pankurun na ani wariba min kofora k'o donna sorodasiw ka minenw na, olu kognew nenabora. O ye nogoyaba don mali ni Efemni ce jenogonya la. Fine minnu tun be sorodasiw ka minenw sanni dicogo la mogow ma, olu latilenna. Sanni kura nataw kecogo bena ségesége konuman. Musaka koro kelen fila ninnu, n'o ye pankurunsongo ani sorodasiw ka minen sannenw donna jamana ka san baarakenafolo bolodalen kono, u be soro ka bo a kono kofe. O yelema min donna baarakenafolo cogoya la, o seben be don depitebulon mogow bolo u k'u fela fo a kan. Sabula wari hake min farala a kan, o be sefawari miliyari 30 bo. O min farala baarakenafolo kan, o be dese ke jamanakonosoro hake ma kemesarada la ni 5,8 ye. Kasoro baarakenafolo yelemanen min fesefesera depitew fe

ka ben o kan utikalo temenen in na, a tun jirala ko dese be ke jamanakonosoro hake ma kemesarada la ni 5,2 ye.

Cidenwyetanunilase goferenamanma; sabula a sera ka san 2015 baarakenafolo boloda; o min bilala depitew ka bolo kan okutoburukalo in na k'o fesefese. Sinsin bena ke o baarakenafolo naniya sirilen in kan Mali ni Efemni ce san 2015 kono; oyere la, a kolosilen don ko dese be ke jamanakonosoro ma ni 4,4 ye kemesarada la. Dese be k'o musaka hake min ma, n'i y'o tila 4 ye, tilayoro 3 bena se ka dafa ni demewariye. A be jini nafoloko sorotaw la Afiriki tilebinyanfan kono. Efemni nisondiyara ni yelema dorinenw ye wusuruko cogoya, musakaw topotocogo, juruw topotocogo ani faso ka nafolosoba topotocogo la.

Yanni cidenw ka taa, u nemogo Kirisitiyan Zosi ni Mali ka nafoloko ministri Madamu Buware Fili Sisoko jera ka kunnafonidilaje ke. O laje in senfe, Kirisitiyan Zosi y'a lira ko jamana ségeségelikélabo ni faso nafoloko kiiritigesoba ka cesiride kera sababu ye ka nogoyaba don Mali ni Efemni. Ocakeda fila ninnuka baara keli u yere kolo la, o joyoro bonyana kosebe a ko la. A sera k'a to Mali kunkankuma nafoloko la, o ka ta ba

A to be ne 2nan na

Jamanakuntigi ka pankurunsanko ni sorodasiw ka minensanko ségeségera jamana kiiritigebulonba fe

O ségeségele in yamaruya dira minisirinémogo fe, walasa ka koninnu tine n'unkalondón ka bojogon na, k'a dón n'u kera sariya kono, jamana ka nafa kama.

O hukumu kono, kiiritigebulonba y'a jira kopankurun min sanna, n'oye Boyingi BBJ 737-700 IGW 1999 ye, o sanniseben labenna angilekan na k'a bolonobilala san 2014 feburuyekalo tile 10. A bolonobilala Mali goferenaman fe, o joyoro fara kelebolow ni sorodasi koro minisiri fe ani cakeda Akira, o joyoro fara Keri Warayiti fe.

An be don min na, n'o ye okutoburukalo tile 16 ye, dolariwari kelen be ben sefawari dorome 104



Kiiritigebulonba nemogo
Nunhun Tapili

ma. Pankurun in sanna dolariwari hake min na n'i y'o sanga sefawari ma, o ye sefawari 18.798.000.000 ye. O senfe, sefawari 1.560.000 dira cakeda were ma; o togo ye «Sky color». O bolen ko yen, sefawari 780.000.000 fana dira a kunkoro. O la pankurun musaka mumé taara i jo sefawari 21.450.000.000 la.

Kiiritigebulonba ka ségeségele y'a jira, ko feere in latigera «geryagere» la. O koro ye k'a kera i n'a fo mogo fila b'u den ka feere ke jognon ma. Kasoro

faso cakeda yamarualen de tun ka baara don, minnu be taamakow jenabou ani Mali pankurunko cakeda.

O bolen ko yen, nemogo min be jamana nafoloko donkabo bee kolosi, o te feere in kalama; bawo a bolono te sebenw na. Sariya min b'a wajibiya ale ka jamana nafoloko donkabo bee kolosi, o ye jamanakuntigisariya n° 97-192-PRM sariyasen 123nan ye.

A to be ne 8nan na

KONKO BE NE 8NAN NA

De fofol

Ia. Goferenaman sonna cidenw k'uka sègesegeli ke uferé ma. U'yofoli fana ke. O bëe nana ni njogonfaamu ye. Kirisitiyan Zosi y'a jira ko fen min tun ye Mali ni Efemì fo nogon kono, o tun ye musakabaw keli ye, minnu tun ma dantige a ka san baarakenafo kono. Fura min sorola o waleya in na, o kera sariya do tali ye Mali fe ka jesin sorodasiw ka minenw sancogo ma gundo la; ani fen o fen be san jamana togola k'o bëe don sariya kono. Mali ni Efemì ani bankimɔnjalı bëe y'a seko ke ben sabatili la Mali ni Efemì ce k'a ta zuwenkalo la fo ka se bi ma. Sariya kuraw dajirala Mali k'a kun don olu koro jamana togolafenw sanni dicogo la sannikelaw ma. O de koson jumadon setanburukalo tile 26 san 2014, Mali y'o sariya do labatoli yamaruya di. Benondonni hukumu kono Mali ni Efemì ce, sègesegeli sera k'a topankurun min sanna jamanakuntigi fe ani sorodasiw togolaminen sannenw musakaw ka don. Sefawari miliyari 69 ni k'o tun ka kan ka don sorodasiw ka minenw sanni dafe. Goferenaman fana tunye miliyari 100 garantilahiduta. Sira diligoferenaman fe sègesegeliw ka k'a nema, fili kelenw son kera olu latilencogo ma, o bëe kera goferenaman tanuko ye. Tanuko filan o ye goferenaman keli ye k'a yere labila Efemì cidenw sago la u ka baara ke ka kunnafoni nafamaw soro min bëe se ka don Efemì nemogjekulu bolo, sariya dajiralenw labatoli hukumu kono.

Ni dandkarila faso nafo topotcogo la, sariya be nangili wajibya. Mali y'a kun don o sariya in waleyali koro. O siratigela a be jamanadenw kunnafini o sariya in tali la. O ye mara kecogo numan taamasiyen do ye.

Sègesegeliw sera k'a to a ka don, ko minen minnu sanna, caman tun farala usongow kanyuruguyurugu la. Sorodasiw ni sorodasi korow ka minisiriso tun ye sanniseben minnu bolonobilal a ni sannikelaw ce, o musaka mumetunye sefawari miliyari 69 ni k'o ye. Jamana ka sègesegelikela ka sègesegeliw y'a sementiya, ko sefawari miliyari 29 tunfarala wari hake kanyuruguyurugu la. A jesinina k'a don fana, ni waridow bolen te fan were fe minnu ma ta baarakenafo kafolen na.

Sorodasiw ni sorodasi korow ka minisiriso fan fe, a yera ko bolono tun bilala sanniseben dow la, minnu musaka mumetunye sefawari miliyari 134 ma kasoro miliyari 34 doren de tun yamarualen don baarakenafo kono sorodasiw ka minensan kama. Goferenaman koni y'a sebekoro firifiri k'o warin hake lase sefawari miliyari 57 ma. A kolosira ko sefawari miliyari 7 donna farikolonenajekeyoro kura dafe, min ma bo baarakenafo kono. A be fo o yoro in ma tubabukan na «pale de sifori». Walasa ka sira tilennen minne, a jesinina goferenaman

fe a ka nin bëe don baarakenafo kono.

Kirisitiyan Zosi y'a jira k'u nakun ye mako ne. K'u ye kunnafoni minnu soro sigikafò folo ni filanan na, o bëe bëna don Efemì nemogjekulu bolo; nka yanni o ce, u be yamaruya di Efemì ka sefawari miliyari 6 labila Mali ye joona, geleya teliman dòw be jamana na a ka se k'olu furaké a tumana. Mogo n'i jenogon ce, geleya waati be yen, nogoya waati fana be yen. Ni geleya nana, a numan ye o ne ka nini ji nemajolen na. O de koson wajibit tun ye nin sègesegeli in ye. Fura sorola geleyawla. A to ye Mali ka teme n'aka lahidu talenw tiimeni ye. Siga t'a la nin ye bëen ni dannaya seginnen ye Mali ni Efemì ce.

Efemì ye wari tigeli min ke Mali la, nafofoloko minisiri nininkalen o kolo la, a y'a jira ko wari min bëe don baarabaw keli dafé n'o ye (FSI) ye, o kemesarada la ko 30 tigera ka bo la; kasoro jamana ka mako caman tun be nénabò n'o ye. N'o y'i bo a la baara fen o fen be ke jamana kono o bëe musaka be bo baarakenafo la. Wari in tigelen, Mali yere t'u b'a jilaja ka

baarakelaw ka saraw, pansiyanw, kalansaraw jamana kókan ani goferenaman ka baaraw keli musaka nini jamana kono. Madamu Buware Fili Sisoko ye folilase wusurukaninaw ma kosebe nin waati geleyn in latemecogo la. Tijé na wusuru doren tun te se ka goferenaman ka musaka bota bëe daken. O de koson a tun ye sefawari miliyari 45 juru tali nini baarakenafo kono. Nka kabinigeleya donna wariko la zuwenkalo konona na, goferenaman wajibiyara k'a ka juri ninita hake se miliyari 100 ma yanni ka san kunce. O jesinina Afiriki tilebinyanfan waritigwi la. An be don min na, minisiri y'a jira ko juru min ninini kofora, n'i y'a tila 3 ye, fila dakena fasonafolobonba fe kaban. A tenu meen goferenaman bëna wajibya ka juru were ta ka baara keta dòw waleya.

Fen min ye wari minnu farala sannisebenw kan yuruguyurugu la, minisiri ka fo la, dansagon donna baara la. Ak'a be san 20 bësorodasiw ka minenw be san nin cogoya la. Yelemani fosi tun ma don a sariya la folo. Sariya kura min tara a ko la, o

bëna a to dannaya ka to sannikelaw kan, n'o ye julaw ye. Sanniseben minnu tun bolonobilala, a caman labanna ka bo a ma. A geleya caman sirilen be sanni sariyasen 8nan na; n'o ye fen santaw sanni dicogo ye mogow ma.

Jininkali kelen, ko yala sègesegelikelabako tenu dabila Mali kono wa? Minisiri y'a jira k'o naniya te mogo la folo. A ko sègesegeli cakeda feno fenbe jamana kono, a be wajibya o bëe kan u k'a baara ke ni laadiriyaye. A be san 3 bo Nansarajekulu be k'a nini Mali fe, tilenbaliya sègesegeli la, Mali k'o geleya in furake.

Kuma kuncé la, Madamu Buware Fili Sisoko y'a jira ko sègesegeli fen o fen kera bëen ni dannaya sòrocogo la Mali ni Efemì ce, o jaabiw bëna bila minisirinemogosoka kunnafoniso (siti) kono Enterineti kan. Efemì ye nangicogo minnu dantige faso ka nafofolo kurujali kan k'o bëna ke cogo di? Minisiri y'a jira ko Mali bëna a ka lahidu talenw tiime. Ko mogo si te sariya sanfe.

Fatumata Mayiga
Dokala Y. Jara

Kelebolow minisiriso la, yuruguyurugusanni bënkansében 15 kera falaki ye

Kelebolow ani sorodasi korow ka minisiri, Koloneli Mazori Ba Ndawu



Mali kelebolow ani sorodasi korow ka minisiri, Koloneli Mazori Ba Ndawu ye kunnafonidilaje do ke taratodon setanburukalo tile 30 san 2014, a ka cakeda ia.

Lajé in kuntu ye ka kunnafonidilaw ladonniya yuruguyurugusanni kan, minnu tara ka jesin Mali kelebolow ma. O yuruguyurugusanni tunye janfa ye ka jesin Mali ma. U ma ke sariya kono, wa utonotun te se Malik kelebolow ma. Yuruguyurugumogo minnu y'a laben, a tono tunye olu doren de taye.

Djé wariko tonba min bëe wele Efemì (FMI), o nemogow de nana sègesegeli la an ka jamana kono, ka nin janfa in boro, k'a da kene kan.

O hukumu kono, kelebolow minisiri y'a jira ko yuruguyurugusanni bënkansében 15 wulila. O yuruguyurugusanni minnumusaka tun ka kan ka bëen sefawari miliyari 33 ani miliyon 600 ma. Baarakeminew, kelekeminewani makonéfenwérew, ou de tun bëna san k'u di Mali kelebolow ma. Nka yuruguyurugumogoye sannisebenw

laben ka songow sigi u yere ye, songo minnu ka ca kosebe ka teme minen santaw songo jenjénw kan. O kun tun ye walasa farankan ninnu ka jigin olu ka jufa kono. O sonyaliba min tara ka jesin Mali ma, n'a gundo poyira Efemì mogow fe, Mali kelebolow minisiri ka kunnafonidilaje in kera sababu ye k'o sementiya ani k'a nefokunnafonidilaw ye u k'a da jamanadenw tulo kan. Kelebolow ka nafofoloko ni minen kow nemogó Koloneli mazori Amadou Makan Sidibe ani kelebolow minisiriso sekererizerenaleri Zenerali Mamadu Lamini Balo tun, b'a kene kan. Olu farala u ka minisiri kan ka kunnafoni caman lase mogow ma.

Yuruguyurugusanni bënkansében 15 minnu wulila, walima ka finé bila u la, o dòw filé nin ye :

- 1 - Jekulucakeda «KOPP-Mali», sefawari 736.075.046,4 tun bolodara; o ye wari kun folo min tun dira o ma. O warin in be lasegin.

- 2 - Jekulucakeda «ICS», sefawari 331.090.834,1 tun bolodara o ye. Wusuru bëe b'o la; n'o be wele

«T.T.C».

3 - Jekulucakeda «ETS-Ak», sefawari 673.163.552 tun bolodara o ye;

4 - Jekulucakeda Danaya Bisinesi Sarili (SARL), sefawari 684.093.618,2 tun bolodara o ye,

5 - Jekulucakeda «CIM», sefawari 3.089.177.800 tun bolodara o ye; nka 2.198.068 binna o la; to min tora, n'o ye sefawari 891.109.800 ye, o tun donna minenw na kaban kelebolow ye;

6 - Cakeda «AB-Service SARL», sefawari 680.069.951,4 tun bolodara o ye. Wusuru bëe b'o la; n'o be wele «T.T.C».

7 - Jekulucakeda «GEO-SECURIT», sefawari 68.817,2 tun bolodara o ye. Wusuru bëe b'o la; n'o be wele «T.T.C».

8 - Jekulucakeda «Scorpion Service», sefawari 10.888.177.240 tun bolodara o ye walasa ka helikoputeri 2 san; olu ye pankurun suguya do ye;

9 - Jekulucakeda «Scorpion service» tuguni, sefawari 4.666.050.096,2 tun bolodara o ye. Nka sefawari 3.266.050.096,2 binna o la; a to 1.399.075,03 min tora, o bennna kodaminewarima, n'o ye 30% ye. Minen dili bolodara ka ben tile 90 ma;

10 - Jekulucakeda «Espoir de demain SARL», sefawari 214.006.388 tun bolodara o ye. Wusuru bëe b'o la; n'o be wele «T.T.C».

11 - Jekulucakeda «Africa Energy SA Nigeria LTD», sefawari 12.466.123.844,2 tun bolodara o ye.

Adama Jara
Mahamadu Konta

Sariyakow minisiri ye nəfoli ke kiiriko cogoya kan fanga san kelen kono

Surofenko ni yuruguyurugu keleli hukumu kono, nininkali dəw kera Sariyakow minisiri Mohamedi Ali Bacili la, jamanakuntigi Ibarahimu Bubakari Keyita ka fanga kelen ka san kelen soro. An bəna o nininkali dəw jaabi da Kibarū kalanbaaw tulo kan.

Nininkaliw kera Mariki Kulubali fe telewison na.

Kunnafoniy'a jira ko kiiritigela dəw minəna yuruguyurugu la. O ko bə dakun jumen na?

O kera. N'i y'a men k'i bə surofen kele, i b'a kele k'i jigi dalen to sariya kari, k'i jigi dalen to sariya bolibaaw kan. Sariyaboliba ye jamana mogoba dəw ye. A fora koboda te Mali bolo n'a ma ke sariya labatoli ye.

Kiiritigela te se k'a sago ke sariyabolaadew na, ko mogow wəre te se ka ko bo ale ta la. Sago te kiiritigela la; sago be sariya de la. Ni kiiritigela y'a yere kalalafili kə sariya to yen k'a b'a yere sago ke, o y'a donnen ye fili la. Mogow tow be nangi cogo min na n'u donna fili la, a fana be nangi a k'o fili koson. O de nana ni kiiritigela dəw minəni ye Mali in kono yan. Kiiritigela mana yeresagobaara ke, a be minə k'a nangi o sariya in fe, a ka kan ka to sariya min kəkərə ka baara ke ni läadiriya ye.

Sariyakunda gəferənamanyedabali jumen tige ka yuruguyurugu kunben ləkəli la?

Walasa ka sariya labato kalankola, kalan minisiri ye wulikajow ke. O de kr. ən, a jeyara kalanden minnumana kalan ke a nəma kii'məniw na, yamaruyaşəben ka di olu ma. Ni min ma səbe ke, fosi kana yuruguyurugudilan ka di olu ma. O waleya in fisayara. Fələ n'itun minəna yuruguyurugu la; fen tun te bə a la. Nka, minnu minəna ka don kaso la, olu b'a dən sisan ko fen b'a la. U ye wari min soro u ka waleya jugu la, sisan b'a soro u b'a la ka awokaw ta o la k'a nini k'u lafasa, u ka se k'a bo kaso la.

An ka jamana kono, mogow haminkoba də ye dugukoloko ye. Nka dugukoloko mankan cayalen don. Ninan, Sirakorç-Ñare, Kalabanbugu ni Baginda-Ñananbalen, ninnu bə Kati mara la, ka fara Yanfolila, Lamini Banba Sikaso ani fo ka se Bamako dugukonəna ma. Senu pankurunjiginkene masurunna na, dugukoloko mankan bə dakun jumen na, sariya bəna mun ke?

Sariyakow minisiriso y'a jira ko kiiri fen o fen be se kiiritigesow la, n'i y'o kəmesarada 80 bə dugukoloko kan.

*Sariyakow minisiri
Mohamedi Ali Bacili*



Mogow minnu bə dugukolo di mogow ma ni səben ye, olu dənnen don. Kiiritigela te dugukolo tigiya səben di mogow si ma. Fənəgənkəbətə mogow minnu ce olu de bə se kiiritigela ma a k'u bo nogon na. N'i y'a men kiiri, səbenko don. Səbenw dilanbaaw k'a lajə ka sariya labato u dilanni kono. O be də bə geleyawla. An b'a nini kiiri tige tige kan. Mogow minnu bə kiiri tige səben lankolonw kan, olu nəna k'u ka waleya selen bə yoro min na, ko mogow si te se ka ko bo u ta la bilen jamana in kono.

Dəw ye dugukolo feere cogo jugu bəe la, fo k'u ke baana ye o nafolo la. U nəna k'a te ku mogow la k'a da maga olu ka waleya jugula. Nafolo b'u bolo u be mogow tow kele n'o ye.

Mogow k'a to u hakili la, ko dugukolosəbenw bə dilan komandanw fe, ubə dilangəferəneri w fe, u be dilan fəso ka dugukoloko cakeda fana fe; n'o ye «doməni» ye. Ni səben numanw ma k'olu ye, u be jamanadenw bila nogon na. Basigu tena jamana kono dugukoloko la. O n'a ta bəe yuruguyurugumogow mako t'o la. A dalen don a yere la ko a fansi baasima tena se ale ma k'a sababu k'a jiligamogow an'a bolonafolo hake sərəlen ye yuruguyurugu la. Don o don a b'i n'a fo də bə fara dugukoloko geleya kan. Mogow yere te dutəren nini bilen. Bəe kera foroninina ye.

Sariya ko laadaladugukolo ka to a tigiw bolo. U yerebə se k'a feere walima k'a di mogow ma. N'o te mogow si te se k'a feere mogow were ma ni səben lankolon ye. Dugukolo te se ka mine n'a tena ke jamana ka ko də kəyoro ye. Hali o la n'a be bə sigidalamogow taya la, a kunnafalen nafolo bə di urma folo. Min ye səben lankolon in dilan an'a dilanna ka di mogow min ma, u fila bəe ye binkannikelaw ye. Min ye nkalon papiye dilan an' nkalon papiye bə min bolo, a fila bəe nkalontigi. Uka kan ka minə k'u kiiri ka don san 5 fo 20 kaso

la. N'i wulila k'i b'a ko nənini, geleya dan don. I b'a soro bəe da bə file kelen na. U b'u sen da a ko kan. I te mogow si soro min bə titirifonse dilannen ninnu kunnafoni jelen di i ma. Hali n'i sera polisiso min na k'i b'u wele, i te mogow soro min bə fariya k'u wele. N'i ye min nəninka o bə sən k'a fo i ye ko minisiri yere de don, k'olu seko t'a la. Kasoro nkalon fin. Ko bə sumaya, k'a sūulu-saala; hali dalilu minnu ka kan k'a jira ko u kelen don ka tijəni ke, u b'o bəe latunun.

Mogow ka nin nogonkəmadogo n'o taa o taa, sariya ye də fə a-kan. Sariya ko, ni fen sonyanaw ye bən-bən-bən ke, ka nkalon laben k'u be jamana maracogo numan lagosi, u nə bə minə. Sabula u y'a nini ka sariya kele. N'i dun ye sariya kele, i ye jamana kele, k'a lagosia kana seka ke jamana barikama ye. Tubabukan na a be fo nin waleya in ma «cohalision contre le fonctionnement des institution de l'Etat». Odunjateken don kojugubakəs ye ka nəsin jamana basigili ma. Mogow min mana minen o la n'a jora i la, i be nangi i n'a fo mogofagala. Siga mana ke mogow min na nin waleya la, i bolo bə bə i joyoro baara la folo, kasoro ka səgesəgeliw damine. Kalosara fana bə tige i la folo, fo ka kiiri tige tuma min na. A tigilamogow, n'o ye mogow min bə

seka forotaari 700 sən k'o bə titirifonse ye, wariba ka kan ka soro a bolo. A mana surofen di mogow o mogow ma k'a deme a ka kojugubake in na, n'i y'a minə, i k'a dən k'i nominenikiiri bə sen na. I ta yere bə sən k'a juguya a ta ye. Jamana marako numan sira fe, nin kiiri bə tige a nekan. Mogow si təna se k'o bali. U bə se ka səbenw latunun; nka u bə k'a bən-bən-bən min siri jamana kəkan, u nə bə minə n'o ye.

Mogow minye Sirakorç-Ñare taari 700 in titirifonse dilan, a bə wele fanga la. Yərə caman bə kofo k'o ye sojocakedaw ye, i b'a soro o tə dəwərə ke dugukolofeere kə. U ni fəso ka cakeda mogow dəw bə baara ke nogon fe dugukolotigiya səbenw sərəli kama. U bə mogow ka yərəw minə ula, k'u bo goferənaman fana taya la k'u feere mogow wərew ma k'o nafoj jigin u kun. O bən-bən-bən bə sojocakeda dəw ni fəso ka dugukoloko cakeda mogow dəw ce. U b'a la ka bin dugukolotigiw ni fəso yere kan o cogo la. U k'a dən ko bo kera u kalama. U bə halo cogo min na ani soro min b'u la k'a sababu k'u ka yuruguyurugu ye, a bəe faamuyalen don. U k'a dən fana ko ke b'ukə. Titirifonse dilannen bəs səbenw bəna fəsəfəsə a tə meen.

O kərə ye ko hali yərə minnu na ni mənkan wulilen te dugukoloko la, o titirifonsew səbenw fana bəna səgesəgeliw wa?

Siga fosi t'o la; o yere y'a numan ye yanni ka se tijəni yoro ma. Mogow gənsan ka taa dugu wəre dugukolo feere ni səben lankolonw ye, o tə se ka bən bilen jamana in kono.

Nin b'a jira ko mənkan wulilen file yoro o yoro la, a bəe kunko bə sariya bolo?

A bəe bə sariya bolo. Wa a bəna u nənabo. I ye yoro minnu kofo olu yere dərən te. An bə se jamana marayoro bəe la ka səgesəgeliw ke mogow ka titirifonsew sərəcogow la. Fen o fen mana soro o səgesəgeliw la, o

A tə bə ne 6nan na

Nizeri sorodasi 9 fagara Mali kərənfəla la

Nizeri sorodasi minnu bə Minusima kono, o 9 fagara jumadon əkutəburukalo tilə 3san 2014, Menaka ni Ansongo furancə la kojugubakəlaw fe. Obinkannikelə ninnu y'uka mobilili filə tige, ka taa ni filə ye. Sorodasi ninnu bətə tun don Menaka ka taa Ansongo. K'u to Endelimanı dugu masurunna na, u ni binkannikelaw balala nogon na. O dugu in ni Ansongo cə ye kilometrə 100 nogonna ye. Binkannikelaw ye sorodasi 9 faga Nizeri sorodasi ninnu na ka taa ni dəw ye. Nin y'a siyə folo ye dankarili min bə ka kə Minusima sorodasiw la, mogow caman ka to a la yərən kelen. Nin be Minusima sorodasi fagalen dafa mogow 30 la ani ka joginnen hake se mogow 90 ma, kabini kərənfəkele daminenə. Minusima ka Mali dəmə jamana basigili la, o yamaruya dira kabini san 2013 zuluyekalo tilə folo la.

Desebaatow de ka ca wulakonoduguw la

A be fo ko nōgōndēmē be Mali kōnō ka nēsin kērenkērennenya la dēsebaatow ma. Nka o dēsebaatow be minni?

N'i yé ne nininka, ne b'a fo ko dēsebaatow de ka ca wulakonoduguwla: Mōgōw b'e wula kōnō, kalo kōnō olu te sefawari dōrōmē 100 soro ka jége jalan san ka k'u ka naw na.

Hali nanakēkōgō dōonin, o te soro a dōw fe. Fen min ye malo ye, san kōnō dēsebaatow dōw t'o soro ka dun hali sijn kelen nōseneyorōw la. N'i y'u kēto ye ka sogo soro, fo ni bagan min be nini ka jufa n'o to lasera. Dōw de b'e sogo soro ka dun o cogo la.

Nka ne ma min faamuya,

waati bée la anw b'a ye fen caman be di dēsebaatow ma Bamako; kasorō hali o dōw be se k'anw wulakonodēsebaatow ta baarakēdenya la san kōnō. A fo jamana nēmōgōw t'a dōn, ko sēgen be wula kōnō? N'u ko mōgō bée dama ka kan Malidenya la, n'o kuma in ye tine ye, nēmōgōw k'u kōfis wulakonomogōw la.

Mōgōw be wula kōnō, olu be sunkalo tile 30 bée sun; nka hali sukaro dōonin, u t'a soro ka k'u ka fen mintaw la. Ala ye anw sigiyorō b'en wulakonona ma. Ni Maliden bée ye kelen ye, jamana nēmōgōw k'u hakili to an na.

San 1970 waati la, kabamugu ni nōnōmugu tun

be di wulakonodēsebaatow ma, hali n'a haké tun te laboli ke. O waati la an tun b'a-dōn ko jamana nēmōgōw hakili b'an na.

Ne b'a nini nēmōgōw fe, u ka dēmē nēsin jamana dēsebaatow bée ma. Akana ke dugubaw kōnō dēsebaatow dōron ye bilen. Seliba fara selinin kan, hali san donba wərew la, mōgō dow te hali sisé kelen soro ka faga u ka denbaya ye. Olu ta kōnō ye seli sera a temena dama ye mōgō tow cēla. Sēgen te bulonda kelen na. An ka jateminé ke dēmew diyorōw la:

Yakuba Bengali ka bo Nolonebugu, Dogoni komini na Sikasso

Maloturu kēcogo kura nafa ka bon



Ibarahima Baba Jara

Sēne kadara kōnō, Ofisidinizeri ni sēnekēlaw bilasirabaaaw, sēne nēmōgōw ani dēmēdōn cakeda Efudepe - Emude (FDP-MD) taara forodōwlaje nōgon fe. Efudepe - Emude ka baara nēsinnen be malo

turucogo kura matarafali ma. Juru be da ka malo turu c'fe sira ni sira. Maloju naani o naani, angere jemani doonin be ton olu kofe. Ola foro taari kelen angere jemani be ben kilo 120 ma. Ni malo falenna ka tile 8 walima 12 soro, a be se ka bo ka turu foro kōnō. Faranfasiso tun y'a kānu a ka toridēn dōw ka malofor. w ka taa laje. An ka nsanrii do b'a fo ko «ko ladege ka fisa ni mōgō kōnōye». O siratige ia, sibiridōnsetanburukalo tie 20 san 2014, taa kera tondēn dōw ka forow laje. I n'a fo Sumele Balo ka foro «Km 19» la. Daramani Togo ka foro «Km 18» la, Sidiki Tangara ka foro «Km 18» la, ani Poli Tangara ka foro «Km 18» la. Foro ninnu malow tun sēbekorōcōrōlenbe. Uyecogo be mōgō nisondiya. O don baara kuncera Faranfasiso dagayorō la.

Karidōnsetanburukalo tie 21 san 2014, taa kera Modibo Kinbirika foro laje Kinbirikewere la. Ale cēsirilen be juruninko ni bōnbōnnikō fe kosebe. N'o ye malo turuli ye jurunin fe ani ka nōgō bōn-bōn maloju naani o naani furance la. Mentigila nōgon te. A ka foro kera nōgōntye foro tow cēla. Jama ye foli ni tanuni lase Faranfasiso ni Ofisidinizeri ma, u ni sēnekēlaw cē baarakēnōgonya la. Sabuia nunun te san soro juri ko. Ibarahima Baba Jara ka bo Surukutu Km 18 la, Dogofiri komini na Jor

Balikukanl be nimakaran na wula kōnō duguw la

Ne be nin bataki in ci Kibaru la ka foli lase a baarakēlaw ani Arajomali baarakēlaw ma.

O temenen kōfē, ne ka jateminé na, a ka galen balikukanl ka taa ne wula kōnō; k'a sababu ke dugu kōnō karamogōw sarabaliya ye. Dugumogōw t'u sara, jamana nēmōgōw fana te k'u sara. Fo ni poroze min y'u bila bāara la waati min ha k'u sara. N'o te u te sara soro dugumogōw kalanni na.

Karamogōya nafa ka bon a sēgensara sōrobaliya ma. O de koson balikukanl be nini ka nagasi wulakonoduguw la. A te ka dabilia, a te ka taa ne.

Faraban Balo ka bo Fuladugu-Kötuba, Kita

Poyi : Yereta sanyelmaseli



Basiru Fomba

San 1960, san min nōgon ma da.

Setanburukalo!

An te nine kalo min kō. «22», jatedēn barikama Alamisadon, don min nōgon te dōgokun kōnō.

Jonya te horon danbe ye. San o san setanburukalo tie 22, Malidenwb'umiiri ka taasibila kē, Ka nēsin san 1960 cēbaaw ma.

Modibo Keyita, Mamadu Konaté, Fili Dabo Sissoko, An'u nōgōnnaw, K'an hakili to Ahamedí Seku Ture

Ka nin kumakanjé kelen in na :

Ne be faantanya fe yēremahoronya kōnō, Ka teme fentigiya kan jonya kōnō.

Basiru Fomba ka bo Jele Bugukurala kominina, Doyila mara la

Bi ma musow bila geléya kōnō

Ne nisondiyalen be nin bataki in ci Kibaru la ka foli lase a baarakēlaw ma dan te foli min na. Ka Arajomali baarakēlaw fana fo.

O temenen kōfē ne bēna kuma folo musow kan; n'o y'an momusow ye. Olu ye sēgen min ye u ne na, halibi musow b'o geléya kōnō. Nka geléyaw cogoya te kelen ye. Waatiw temēna geléya fanga tun ka bon musow kan fo ka damatēme. Sabula ni muso tun furula ka don du kōnō, o tun y'a ka geléya daminēn ye. Muso soro tun man di; bawo u haké tun man ca o cogo la. Dudōw kōnō i tun b'a

soro ce duuru be soro yen; ce kelen dōron ye musotigi y'olu cēla. Muso b'olu ka finiw ko, ka tobili k'u ye, k'a bée ka so furan, ka bē kolijj bō. N'a bē bō dumuni diyorō la foro la, a bē dōgo nini ka na surōfana tobi:

Su ni tile dumuso be baara la, lafiya t'a ye. O geléya kelen be musow kan wula kōnō halibi. Finintanya ni baarakēminendēsé min tun bē folo musow la, o te bi musow la. Donfini fanba tun ye dalifiniw ye. Dankannako tun te yen folo. Muso dan tun ye taafé kelen, duloki kelen ani musoro kelen ye.

Yaya Mariko
ka bo Senu Bamako

Faamaw ye man di

Minisiri, depite ani direkiteri mako be ne na. Nka, u ye man di, fo n'i ye u yeli in fara i ka san baara ketaw kan. A b'i n'a fo dibila be u ni mōgō tow cē.

Mōgō o mōgō, ni cogoyaba t'i bolo, n'i ko i mako bē minisiri, depite walima baarakēyoro do nēmōgōla, fo n'i ye nēgesabara don i sen na a ninini taakasegin kama. N badenw, n'i ko minisiri be

minni? A ka dakolosilaw b'a fo k'a taara dugū la. N'i ko baarakēyoro - nēmōgō (direkiteri) be minni? U b'a fo k'a ni mōgō be nōgōnyela. K'i ka na sini. Odugujé n'i nana, u b'a fo k'a bora. Ko sini i ka na. I bē san kuurukaara ke taakasegin na; abada i ne te da minisiri, depite walima direkiteri kan. N'u teriw n'u somogō surunw te, u te mōgō wēre jate.

Ni nin waleya in ma dabila

jamana kōnō, an be to kō an te taā ne. Kasorō ni kalata don sera, ni mōgō ma bō ka wote, o ye kunmasuuli ye jamana ma. Mōgō minnu be fanga soro kalata senfē, uk'u jilaja ka waati soro k'u kanubaaw kuma nōgōny. An kōnō b'a dōn, ko waati bē te mōgō bisimilaliba tuma ye.

Burama Berete ka bo Diyu, Kajolo mara la Sikaso

Fasokanw jōyōrō ka bon jamanaden fanba kunnafonini na

Ne b'a nini jamana nēmōgōw ani «ORTM» nēmōgōw fe, u ka Mali ka farikolonejé kunnafoni caya fasokanw na, walasa jamanaden fanba ka bo kunpan na. N'o te a nēfobaliya b'a to geléya caman b'a la.

Misali la Kani 2010 min kera Angola, Mali bora; nka Maliden fanba te Mali bocogo dōn a la. Jateminé na, ni wotew sera, jōyōrōninaw b'u ka kanpañi kuma bē k'an ka fasokanw na. Nka n'u ye wasa soro k'u sigira fangaw la kaban, u te kumā anw fe fasokan na bilen. A b'i n'a fo ni kanpañi banna, an ka kanw be bo jamana nēmōgōw kōnō.

O fana temenen kōfē, samiyé taacogo ka ni folo Kita mara la. Ni sanjiko tora a nacogo numan na fo ka okutoburukalo sa; samiyé be sōn ka diya kosebe sēnekēlaww la.

Pate Boli ka bo Danbana, Kōfēba komini na Kita

Kalankene n° 146nan : Cençrow ni cençrow

Nin y'an donnent ye bennaw kalansen kono k'a walawalan. Bonnayali be ke ni noronha suguya saba ye. An y'o fo ka teme. Olu ye nençrow, cençrow ani konçrow ye.

Nin sen in na, an be dan, nençrow ni cençrow ma, olu man ca kosebe. Kibaru temenen na, an y'u neçci fo k'a jira k'u be dajne koro jiidi

1 - Nençrow (les préfixes)

Bamanankan na, nençro ye saba ye : «la, ma, so». Ank'a don ko nençro be noco danekolo la a nefe. Wa u be noco danekolo min na, o ye wale ye (verbe).

Misaliw :

La : ladon, labo, lasigi, layelen, labin, lawuli, latilen, lagosi, lasiran, layele, labila, adw.

Nin dajne bee ye bonna ye bawo u dilannen be ni nençro «la» ani waledo ye.

O bonna ninnu bee ye wale ye; bawo «ka» waleyalan be se ka sigi walima ka bila u nefe. U ni waleyalan be se ka taa ni nogon ye.

Misaliw :

A be se ka fo : «k'a ladon, k'a labo, k'a lasigi, k'a layelen, k'a labin, k'a lawuli, k'a latilen, k'a lagosi, k'a lasiran, k'a layele, k'a labila, adw.

Ma : madon, mabo, magere, majigin, makono, magen, mademe,

matanga, makuma, mafile, adw.

Nin dajne bee fana ye bonna ye bawo nençro «ma» norolen be u la.

O bonna ninnu bee ye walew ye; bawo «ka» waleyalan be se ka sigi walima ka bila u nefe. U ni waleyalan be se ka taa ni nogon ye.

A be se ka fo : «k'a madon, k'a mabo, k'a magere, k'a majigin, k'a makono, k'a magen, k'a mademe, k'a matanga, k'a makuma, k'a mafile», adw.

So : Sodon, sobo, sogere. O misali ninnu man ca. Ninnu fana bee ye bonna ye bawo nençro «so» ni walew don. Obonna ninnubee fana ye walew ye bawo uni «ka» waleyalan ka be se ka taa nogon fe.

Misali la a be se ka fo «k'i sodon, k'i sobo, k'i sogere.»

Kolosiliw

A ma fo ko wale fen o fen be damine ni (la) ye k'o bee ye bonna ye.

Misali la, «ka laje, ka lafijne, ka labi», olu te bennaw ye. O koro ye ko (la) min b'u nefe, o te noronha ye, nençro te «laje, lafijne, labi» la, u bee ye kumaden kelen-kelen de ye.

O cogoya kelen na, «ka matarafa, ka masala, ka maramara, ka mara, adw, olu fana si te bennaw ye; bawo noronha t'la, «ma» min b'u la, o te nençro ye. Nidañekolo te yen, noronha noco be min na, bennako kuma te

fo, kuma te noronha ma.

O be cogo min na, «k'a soço, k'a scço, k'a scço», adw, olu fana te bennaw ye; bawo (so) min b'u la, o te nençro ye. Danekolo kelen de b'u la n'o ye «scço» «scço» «scço» ye, noronha t'la. O la bennako kuma te se ka fo yan.

2 - Cençrow

Bamanankan na, cençro ye fila ye : «n» ani «man». Neçci were si t'olu la, ni dajne fo ka diya doronte. Olu be jiidili min ke, o y'o ye. U bee danekolo fila ni nogon ce, k'u fodiya. N'olu te, danekolo jalanw be gorokoso nogon na.

n : haminanko, nengo, bugurinje, filankafo, jurumantigi

«nan» : jamanjan, cemance,

Kolosiliw :

Bamanankan na, tuma dow la, i be kumaden dow soro dajne cemance la ka soro cençrow te.

Misaliw :

Bololaneg : (la ye kobila ye).

Forolataa : (la ye kobila ye).

Mogoladon : (la ye nençro ye).

Numunakaw (na ye konçro ye). Cençro ye «n» ni «man» doron de ye wa u neçci ye ka dajne fodiya, hali n'o y'a soro danekumaden werew be yen, minnu be sigi cemance la dajne kono.

Mahamadu Konta

den bee te bangebaaw bonya.

Yeremabila nana, ladamuni ma sira soro, sabatibaliya tile bora, denbaya nagasira, du cira. Wariko ye hadamadenw hauwa, ka mogow kodon nogon ma. Bi, i te bonya soro ni wari te, malo te ke i ma ni wari te. Ni min y'a soro, n'o ma juguya ke a kan, o be yaada fo a be bana mogognogon kunko keli ma. Ucamante ye kunkow kene kan, denkundikene, furusirikene ani janjakene.

Mogoya be taa k'u to o cogo la.

O wari ma mogoya ke. Wari te sen joyoro fa. Taa i sen jo banabaato la ka nogoya da a ye, hali n'i ma wari di a ma. Taa i sen jo kasoden na, ka dugawu ke a ye hali n'i ma wari di a ma. O la, tegelankolonya te mogoya keli bali.

2 - Dannaya

Dannaya ye ka danna. Da nna, n ka da i la, o de ye dannaya ye. Da nna ka nin ke n ye, n be nin ke a kosegin ye, i te tige n na. N be da i la ka nin ke i ye; bawo i ko n te tige i la. I te tige n na, o ye dannayako ye. Mantala ni mogoya jera, u ma tige a la. Mantala ye dannamogoya, dannaya b'a kan. Seriba ye dannamogoya, ni waritigwe.

A to be ne 6nan na

Dukens n° 120nan :

Du be se ka balo

Konuman nogoya la (5)

Djne ko bee ye feere ye. Djne ko bee ye jatémie ye. K'i janto i yere la, k'i hakili to denbaya la baloko la, bawo an fe yan, mogo be se ka balo konuman, du be se ka balo konuman kasoro i ma wari caman bo.

Mogo caman hakili la ko tubabudumuniwörönende nafa ka bon farikolo ma, sango waritigwi. Ote tijns ye. An ka farafinbalofen caman be yen, n'i b'u neçci don, i be se k'i wasa don olu la, bawo farikolo nafalanw b'u la, n'o ye witaminiw ye.

Kibaru temenen kono, an kumana vitamini E ni K kan. Nin sen in na, an be doonin fo balofen funtenidilanw, sukaromafenw ani balofen dafalenw kan.

Situlu ye funtenidilan ye, n'i y'a dun, a be jeni dcoenin-dcoenin farikolo la ka fanga ni funteni di a ma. Woso, bananku, no, ninnu bee be jate funtenidilanw fe, u be farikolo fanga don, ka funteni di a ma.

Sukaromafenw ye jiridenw ye. Olu dunnin ni hakili ye don o don, o be fasaw geleya, ka fari foni, ka hakili dayele.

Sefan, nono, di, inburu, olu ye balofen dafalenw ye. O koro ye ko vitamini suguya bee doonin-dcoenin b'u la.

Olu fana dunnin ni hakili ye tuma bee, o ka fisa hadamaden ka keneya ma.

Sinji fana ye balofen dafalen ye. Den ka balo kün fofo ka ke sinji dama ye, nono suguya were si mah kan ka don o senkoro. Sinji bayelema ka di den nugü la, a b'a farikolo kogo k'a fasaw jo, k'a hakili dayele konuman. Sinji be fanga di den ma cogo min na, a be ba tin fana don a la ani mogo o mogo b'a topoto. O be bolen koyen, a b'a kisi bana suguya caman ma.

Witamini fen o fen, n'a ma damateme, a be farikoloni hakili ladon, k'utanga k'u mogoya, k'u k'kenya sabati. Witamini minnu b'an, ka balofen na, olu de nafa ka bón. Nka n'olu fen o fen desere farikolo la, walasa k'u nonabila, dogatorow b'ilila ka taa witamini dilannen san furafeereso la.

Mahamadu Konta

Kibaruseben be bo kalo

o kalo juma laban na.

Mogow be se k'u hakili to

o waati la ka taa u ka

Kibarusebenw nof u

soroyorow la

Le 5nan fo

dannaya b'a kan. Modibo te mogjanfa, mogo ma tige a la. Modibo ye dannamogo ye, dannaya b'a kan. Mogo ye dannaya ye. Furumusobedi a ce ma ko dannaya b'a kan, k'a be semusokoro, k'a bena musosomogow bonya i ko horonya y'a jira cogo min

na, i ko mogoya y'a fo ne min ma. Dannamogo be juru soro ko a tena to juru sarabali ye; bawo a sarabaliya b'a bo horonya la, ka dannaya bo a kan. N'i ye juru ta, ka tila k'a sara, o be do fara dannaya kan fo i be se ka juru were soro. A be fo ko dannaya be jigi di mogo ma. Ni jigi b'i la, i hakilila be tige, fen man di k'o bo.

Mogo ye dannaya ye. Nibi te, mogo be fanga walima jama nemo goya soro ko dannaya b'i kan, ko i be tilennenna kono, k'i tena jama janfa, k'i be forobadon da juman fe, k'i tena foroba yuruguyurugu, k'i b'eha mogo d'no i ka nemogoya sababu ye.

Karamogo Daramani Tarawele
Ladamuni Illnan kalan diya

Mandenkan lajeba do kera Bobo Julaso

Kankodonnnya tigilamogow ye lajeba do ke Bobo Julaso, Burukina Faso, k'a damine nteneñdon na setanburukalo tile 15 ka se a tile 17 ma san 2014. O tile saba kono, hakilijagabo ni hakilifalenfalen caman kera Mandenkan bolofara caman kan.

Mandenkan ye kanba ye min bolofaraw ka ca. A bolofara belebelew ye Bamanankan, Maninkakan ani Julakan ye. Bolofara misennin minnu be fo tilebin fe, o d'ow ye tigemaxo (Bozokan), jogo, ani bile ye. Bolofara misennin minnu be fo woroduguyanfan fe, o d'ow ye tura, gban, guro, jokoro, sanbila, seenku, ani samogokan ye. O kan misennin ninnu fobagaw man ca, u d'ow be jini ka tunun yere.

Kankodonnnya tigilamogoy minnu tun be kene kan, a karamogobaw,

nininikewlaw, kalanden korobaw, olu bee nana u ka baaraw dajira mandenkan n'a bolofaraw kan. Jama jera ka baara kelen ninnu segesegé, k'u sementiya, k'u fili latilen. Lajekela fanba bora nansarajamanaw kan : Faransi, Irisijamana, Alimanjamana, Ameriki, Kanada, Norvezi, Holandi, K'diware, Burukina ani Mali. Nansara tun ka ca ni farafin ye. Laginekaw ma se ka ye kene kan ka da Ebola bana jugumanba in lahalayaw kan. Nin kera a siye folo ye Mali ka ye lajeba in kene kan. Mali joyoro fara Poli Gindo ani Mahamadu Konta fe, olu be baara ke Mali kankow D'nniya. Lejinicakeda la, n'o ye AMALAN ye. Mali kumana dankun fila kan :

1 - «Bamanankan sebenogo sariyaw labatoko juman feerew dantigeli»;

2 - Kibaru joyoro politikko dane kuraw dilanni na.

Dakun folo labenna Mali nininikewlaw ni Irisijamana karamogoba do fe min togo ye Walanten Widirini. Dakun filanan labenna Mahamadu Konta fe; ale ye Kibaru sebenbagà do ye.

Laje in kene kan, kankodonnnya dakun bee lajelen segesegera ka nesin Mandenkan ma : maben ni d'ow ko a ma sariyasun, mankankolomakalan, dañeyelemakalan, kumasensigi, kanhakekalan, kanko tariku n'a seko ni d'ono, d'onnikelaw kumana nin bee kan, Bobo Julaso laje senfe.

Baarasigw fana labenna lajeba in senfe. Kan segesegecogo k'a sariyaw da kene kan an'a mankan kolomaw labocogo, o nejirala lajekelaw la. Mahamadu Konta

Mandenjamana sariyasunba folo san 1236 (3)

Fililatilen : Kibaru temenén kono, sariyasen 24nan na, a sebenen be «Ben ka fisa ni janfa ye», o te; «Ban ka fisa ni janfa ye», o de don. Sariyasen 30nan na, a sebenen be «Furu be Manden ko saba la», o te. «Furu be sa Manden ko saba la», o de don, pan tun kera «sa» de kan. Tilayoro Illnan : Soroenw

Sariyasen 35nan : Togolafen sorocogo ye duuru ye : Sanni, ninna, falen, baara ani ciyen.

Fen sorocogo were ma daga ni seere jorjor t'a la.

Sariyasen 36nan : Fen temenén tigidonbali te ke jama ta ye fo san naani mana teme.

Sariyasen 37nan : Kalifamisi den naaninan ye misi lamarabaga de ta ye. Sisefan naani o naani, sisefan lamarala ta ye sisefan kelen y'o la.

Sariyasen 38nan : Falen siratige la, misi kelen be ben saga naani ma walima ba naani.

Sariyasen 39nan : K'ika kongo furake foro kono forokonofen na, o te sonyali ye; fo n'i ye do bila i ka bore kono walima i jufa la ka taa n'a ye.

Bayelemabaga Mahamadu Konta

Manden Bori (Abubakari 2) bakofetaa san 700nan barosigiw

be taa kogoji dan jini nika a ma segin. Mogo caman t'ale ka tariku kalama, bawo jeliw te kuma a kanka caya, wa sebennikelaw fana ma b'ee seben a kan.

O koson Seyibani Kulubali n'a ka kalanso ye laje ninnu laben walasa k'a ko lajeya, k'a bo dibi la, a ka don ko farafinw sera Ameriki kiritofu Kolonbu ne, ka da u ka cesiri kan, an'u ka d'nniya.

Somogosama min be se ka bo lajeba fila in kono, o file nin ye :

Manden Bukari, n'a be wele fana Abubakari filanan, n'a d'onnien don Manden ni Manden Bori ye, ale kera Manden masa seeginan ye Sunjata salen ko.

Ale ni Kanku Musa be fa la, a d'ogoke y'o ye, u fa ye Sonfagalayi ye.

Folo, arabu d'onnikela 14 de ye sebennike Mandenjamana tarikukan, olu la, mogo kelen de kumana, Manden Bori kan. Kanku Musa taalen Makan, ale de y'a jira o arabu d'onnikela in na, k'ale sigil be fanga la a koroke min no na, k'o ko a be taa a laje ni dan be kokoji la, a ma segin.

Lajeba in kumatigw ka fo la, Manden Bori ye fanga ta san 1301 ka se 1312 ma, o be ben san 11 ma

A to be ne 8nan na

kunnafo niw tene dogo jamanadenwa na.

A nejinini laje bee be ke telewison na. Kewale jugu mana kolosi yorotigi fen o fen ka seben sorocogo la i togo be fo dijema k'i lakodon.

Ninbee kofe jamanakuntigika fanga san kelen kofe, yelema kura were kera wa?

Kunnafonidilaw ka nininkaliwla, fen d'ow kofora sorodasi kunkan k'olu yeyelema kuraw ye. N'iye ne nininka, ne b'a fo k'olu te yelema kuraw ye.

Anjuna 35 foli plenti d'ow ladonnen be kiiriso la. U tun be yen kabini furancelafanga waati la. Mogo d'ow tun y'a jira k'u den sorodasi d'ow tununna. U be balo la walima u te balo la, olu t'a don. Ko kiiriso k'u deme k'u jini. Nka u m'a fo k'u sigalen don mogo la, k'u b'o bolo. Lejininiw damineola furancelafanga to kono.

Mogo minnu minena, i b'a soro o somogodoy'ominet ja anikumakanwa ta a ka telefon na. Olu minnu ye mineni ke olu fotow n'u kumakanwa dira kiirigelaw ma u ka nejinini ke. Jininkaliw taara o cogo la fo ka taa gun yoro labanw na. N'o ye Zenerali Amadu Haya Sanogo n'a jenogon d'ow togow foli ye. Mogo nininkalen d'ow y'a jira k'u ka mogo minenen d'ow fagara, k'olu su donna ding'e kelen kono Jago masurunna na Kati kofe. U yere taara u donyoro jira. O lajinisebenw tun laadonna k'a soro Amadu Haya Sanogo ma mine folo. A y'a soro a yere

kera Zenerali ye kaban. Tuma minna anw nana fanga la jamanakuntigisigikalataw kelen kofe, an ye nin laninisebenw soro kiiriso la. An fana ma kiirigelaw bali u k'u ka baara daminenenw lase.

Lajinisebenw (plentiw) donna bere uruziko la; yala fenw ladonna bere weriko la wa?

Ne ma plenti ye bere weriko kan. Bere uruzi w ka plenti w be don waati min na, o y'a soro ne ye awoka ye, n ma wele minisiriya la folo. D'ow ko ne ye Abudini Gindo ni Isa Angoyiba ka awoka ye. Tine y'o ye. N kera olu ka awoka ye ka teme. Nka ne ma sara dantig'e n'u sic. U ka kiiruw tigera k'u bila kabini furancelafanga k'ono na. O fana y'a soro Amadu Haya Sanogo ma mine. Kiirigelaw tuny'ulabila folo yanni u mako ka jo u la kofe. N'o ye liberite porowizuyari ye tubabukan na. Ajirala ko kiirigelaw y'u bila, nka sorodasi k'u te bo kasol; sabula k'u te sariya ka bolo kan bilen. K'u be sorodasi de ka bolo kan sisan.

Tuma minna anw nana fanga la, Abudini ka awokaw ye seben ci kiiriso la, sabula awoka fila were tun b'a bolo min te ne ye, ko sariya y'u ka mogo bila; nka halibi k'u ma bo kasol la folo. O tuma na k'u ye ko were de ke wa n'u te bila. U ka sebenw lajera k'a ye ko kiirigelaw y'u bila. Tugu kera sariya k'o, ulabilala. Ne be min kalama o mogo ninnu ka ko la, o file.

Dokala Yusufu Jara

N° 6nan to

Karamogo Banba ka fo la, masake kinfantoba wali kinfantoba de tun don. A ko dan be fen bee la fo Ala ka masaya. A ko fo ale ka kokoji dan ye.

Taama folola, a ye kurun 200 wuli, ka ji ni dumuniw ke u kun, k'u kana segin fo n'u ye kokoji dan ye waati min. Mogo kelen doren de seginna o taama folo in na. O y'a jira, k'u sera yoro do la, o wojo tun ka farin. Kurun min mana se yen, o be tunun yewu. Ale min tun be bee kofe, ale seginna ka na o lakali.

Taama filanan na, Manden Bori yere kera taamakuntigi ye, walima sirakuntigi. Solomana Kante min ye karamogo Banba karamogoba ye, o y'a seben ko Manden Bori taara ba kofe, a tununna yewu.

A n'a nofajama taara taama seginbalia.

Kani 2017 labenw ninisiebenw ladonna kaban

Jamana wolonwula y'u ka sebenw ladon Afiriki sennantolatanba Kani 2017 labenni soroli kama : Alizeri, Eziputi, Gabon, Gana, Keniya, Sudan ani Zimbawe. Afiriki sennantolatan tona Kafu y'a jira ko tine yere la, jamana minnu delila ka Kani labenw ke, k'olu joyoro de be son ka bonya Kani 2017 labenni soroli la. Okuma in y'a to ni Ecopi y'a senbo a jinini na. Alizeri tun be Kani 2019 ani Kani 2021 labenni jinini na. Agarijegé ma diya o la; o de koson a be k'a fasa fili Kani 2017 labenw jinini fe ka fara Eziputi, Gabon, Gana ani Sudan kan. Ninnu ye jamanaw ye, minnu delila ka Kani labenw ke ka teme. Keniya ni Zimbawe fana be k'a jinini; nka olu ma

deli ka fen laben a la folo. Jamana 7 ninnu bee koni b'a nofe; an dun n'a ce te teme san fila kuntaala kan bilen. Libi de tun ka kan ka san 2017 Kani laben. Nka ka da geleyaw kan o jamana in kan, a y'a jira k'a tene se k'a ke. Jamana min b'ena sugandi ka bila. Libi no na k'o b'ena Kani 2017 labenw koron yanni san 2 ce, o man telik a ne n'a d'anko te jamana min na ka teme. O de koson Kafu y'a jira, ko jamana minnu delila ka Kani laben korelen, olu de joyoro be son ka bonya a ko la. Nka o si te don folo yanni san 2015 ce. A bonni b'ena ke san 2015 kalo saba folo kono. Jamana min garijegé mana fara ci o bonni in na, Kani 2017 labenni be di o ma.

N° 7folo to

Kiiritigebulonba ka segesegeli ye min da kene kan tuguni, o ye ko sariya sosoli were kera; bawo jamana ka sanniseben bee be ke faransikan na; n'o ye jamana ka baarakékan ye, nka pankurunsansében in dun sebenna angilekan de la.

Nin bee de y'a to ni kiiritigebulonba y'a sementiya, kobaaraw ma k'sariya kono. A y'a geleya taabolow ka yelema, ka segin sariya kono. Sanniseben ka laben angilekan ni tubabukan fili bee la.

Fen min ye sorodasiw ka minensanko ye, sorodasimobiliw n'u minenw, olu fana sannisebenw

bolonbilala kelebolow ni sorodasi k'orow minisiri ni Amadou Kuma fe, o ye jekulucakeda «Guo Starsarl» nemogo ye. Sorodasiw ka minen santaw bolodara k'u hake ben sefawari 34.066.173.400 ma. Bolifew n'u minenw hake bennia sefawari 35.116.105.894,8 ma. O kelen min ke, Amadou Kuma ka cakeda ye juru ta Atilantiki Bankila walasa a ka se ka minen ninnu lase sorodasiw ma, a ka wari be sara a ye kofe. Nka walasa, o juru in ka soro, jamana de jora a jigi koro Banki in na. Nafoloko minisiri de y'i jo o jigiya in koro.

Jamana y'a kandi k'a be minen ninnu songo 25% sara san 2014 kono; k'a b'a to sara san 2015 ni 2016 kono.

Geleya min b'o minensanko in na,

Mali musomanninw ye basiketi kupudafiriki ta sine 5

Musomannin minnu ye kunnawolo ni nisondiya lase Mali ma

Nin y'a sine 5nan ye Mali musomannin zinoriw ka Afiriki basiketi kupu ta. U wulila k'u jo ni san 1996, 2000, 2006, 2008 ani san 2014 kupudafiriki ye. Ninan ta kera Misirajamana kan, u ye arabuw gosi 73 ni 65. U ma dan kupu tali ma. Musomannin min bolo ka di bee ye, o kera maliden ye, n'o ye Jeneba Njaiye. Finali don Mali ni Eziputi ce, a kelen ye kuru 28 don. Mali ka kunben 7 la, a kelen ye kuru 120 don. Musomannin min kera jana ye wulikajo siratige la, o fana kera maliden ye, o togo Mariyamu Kulubali.

Jeneba Njaiye, a ka kan malidenw k'a don ani a tologon bee. Musomanninw ye nin kunnawolo ni nin nisondiya minnu lase Mali ma, usara te malidenw bolo. Mali be geleya ni dusukasi ni kononafili minnu kono bi, ni nin nogon kunnawolo kera musow fe, o ye ko ye min b'a jira ko dusu, sebe, ani se ye olu de ta ye, kunun, bi, fo sini an ka jamana kono.

Jeneba Njaiye min y'u bee la jana ye ale si be san 17 la, Joliba basiketikela dan. A tun d'onnen te kosebe. Nka kabini a yelema d'onn min Joliba ni Mali fe, an'a ka denmisennnya, a y'a yere di, k'a fo ko fasoko don. Jeneba n'a tologonw, Ala ka here ke aw ye.

**Denba Kulubali
Mahamadu Konta**

o ye ko sanni in bennkansében kera fili ye. Folo, Amadou Kuma togo b'o la, k'o ye cakeda in nemogo ye. Filanan Sidi Mohamedi Kajasi togo b'o la, k'o fana ye cakeda kelen in nemogo ye. O bennkansében fili bec bolonobilaladon kelen na san 2013 nowanburukalo tile 13, k'a nafoloko bennsefawari miliyari 69.184.000.000 ma.

Kiiritigebulon ka fo la, o bennkansében fili sifana ma bolonobilala jamana nafolosegesegela fe, i'n'a fo sariya y'a yamaruya cogo min na.

Fen min ye bennkan n°1 ye, o min temena kelebolow minisiri ni «Paramount LTD» ce, o nafoloko bennsefawari miliyari 57.897.000.000 ma. Nebila kera, miliyari 24 ye, o be sara san 2014 kono tile 14 bennkansében

bolonobilalen k'o. A nafoloko to be sara diko 12 kono kalo saba o saba. O bennkansében in fana ma bolonobilala jamana nafolosegesegela fe, i'n'a fo a diyagoyara cogo min na sariya fe.

Fen min fana ye pankurun hellkoputeri fili sanniko ye ka di sorodasiw ma, o sanni bennkan bolonobilala kelebolow minisiri ani jekulucakeda «A. D. TRADE LTD» fe, k'a nafoloko bennsefawari miliyari 64.284.000.000 ma, min be sara san 2014 kono.

Kiiritigebulonba ka segesegeliw y'a jira k'o sanni bennkansében fana ma bolonobilala jamana nafolosegesegela fe; wa feere in tun ma damine folo.

**Madiba Keyita
Mahamadu Konta**

SAN 2014 OKUTOBURUKALO KIBARU KONO

- n° 2 : Kelebolow minisiri so la, yuruguyurugusanni bennkansében 15 kera falaki ye
- n° 3 : Sariyakow minisiri ye nafoli ke k'iriko cogoya kan fanga san kelen kono
- n° 4 : Batakiw
- n° 5 : Kalankene n° 146nan : Nenorow ni cenorow

Dukene n° 120nan : Du be se ka balo konuman nogoya la (5)

- n° 6 : Mandenjamana sariyasunba folo san 1236 (3)
- n° 7 : Depitebulon ye sariya kuraw ta ka nesin sigida lakodonnennw ma (kominiw, marabolow ani Bamako Disitiriki)